



Inatsisartuni ilaasortaq
Anthon Frederiksen, Partii Naleraq

§ 37 naapertorlugu apeqquaqqaammur nr. 096, 29. marts 2016-imeersumut akissut

11-05-2016
Sags nr. 2016-7756
Akt. nr.

Asasara Anthon Frederiksen,

Inatsisartut suleriaasianni § 37, imm. 1 naapertorlugu aatsitassarsiorneq atuinerlu pillugit Naalakkersuisunut apeqquaqqaateqarputit. Apeqququtit akissutit matuma kinguliani takusinnaavatit.

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: paian@nanaq.gl
www.naalakkersuisut.gl

Apeqquq 1:

Aatsitassarsiornermi avatangiisit immikkut illersorneqarnissaat Naalakkersuisut qanoq pilersaaruteqarfigaat?

Akissut:

Aatsitassarsiornerup inuussutissarsiutitut atasussatut ineriartortinneqarnissaa Naalakkersuisut kissaatigaat. Tamatuma peqatigisaanik aatsitassarsiornerit teknikkikkut, peqqissutsumut avatangiisinullu isumannaatsumik ingerlanneqarnissaat politikkikkut ersarissumik tunngavigineqarpoq.

Aatsitassarsiornermi avatangiisinik illersuineq aatsitassarsiornermut inatsit malillugu maleruagassiunneqarpoq. Ujarlernissamut atuinissamullu akuersissutit Aatsitassarsiornermut Oqartussaasut suliasamik suliaqareernerini Naalakkersuisunit nalunaarutigineqartarput. Aatsitassarsiornermut inatsimmi avatangiisinut maleruagassat tunngavigalugit "naammassinninnissamut" tunngavissat aalajangersarneqarput, taakkunanilu suliat, inatsimmi pineqartut isumannaassuseq, peqqissuseq, avatangiisit, isumalluutit atuneq inuiaqatigiillu eqqarsaatigalugit nungusaataannigsumik ingerlanneqarnissaat eqqarsaatigalugu isumannaatsumik ingerlanneqarnissaat ingerlatseqatigiiffimmut piumasarineqarpoq.

Aatsitassanut inatsimmi allassimavoq, suliffissuit teknikkimik pitsaanerpaamik (Best Available Technique (BAT)) aamma avatangiisinik illersuineri illuusissanik pitsaanerpaanik (Best Environmental Practice (BEP)) atuinissaat naatsorsuutigineqartoq.

Suliniutini sulianilu avatangiisinut annertuumik sunniuteqarsinnaasuni tamani, aatsitassanut inatsimmi § 73 naapertorlugu suliffissuit Avatangiisinut Sunniutissanik Naliliinermik (ASN) suliaqartussaapput. Qinnuteqartup ASN-imi avatangiisini pissutsit pingaarutillit tamaasa, aamma BAT-imi BET-imilu tunngavigineqartut

atorneqarsimanersut nassuiaasiortussaavai. ASN-imi sumiiffimmi avatangiisini pissutsinik misissuinerit aalajangersimasut tunngavigineqartussaapput, aammalu avatangiisinut sunniutaasinnaasunik amigaateqartoqartoq, avatangiisinillu illersuinerup pitsaanerpaanissaa qulakkeerniarlugu teknologiinik sunik atuisoqartariaqarnersoq naliliisoqarpat, tapiliussassanik misissuisoqarnissaanik Aatsitassaqarnermut Oqartussaasut ingerlatseqatigiiffimmut piumasaqarsinnaapput.

Tassalu ASN-imut nassuiaammi ilaatigut suliniutit immikkut ittut, suliami pineqartumi pinggortitamik avatangiisinillu illersuinissaq siunertarlugu aallartinneqartussat sammineqassapput. Aatsitassarsiornermi pilersaarusionsornerulli nalaani avatangiisinut sunniutaasinnaasut ataatsimut misissoqqissaarneqarsimanissaat pingaaruteqarpoq. Tamatuma kingorna suliat oqartussaaqatigiinnermut tunngasortai (tamanut ammasumik tusarniaaneq) ingerlanneqassaaq, naggataagullu suliassaq kissaatiginarnersoq, aammalu avatangiisinut sunniutissat akuersaarneqarsinnaanersut Naalackersuisut aalajangissavaat. Kiisalu Aatsitassarsiornermut Oqartussaasut ASN-imut nassuiaat tunngavigalugu suliassamut pineqartumut piumasaqaatinik atugassarititaasunillu aalajangersimasunik aalajangersaassapput, taakkunungalu avatangiisinik misissuisarnissamut (alapernaarsuisarnissamut) sinaakutissat ilaatinneqassapput.

Aatsitassarsiornermi oqartussaasut ilitsersuutinik arlalinnik suliaqarsimapput. Ilitsersuutit malittarisassanik, piumasaqaatinik, eqqarsaatigisassanik killilersuutinillu, suliffissuup suliassanut aalajangersimasunut avatangiisinut naliliinissamut (ASN) piareersaanermini eqqarsaatigisassaanik imaqassaaq. Ilitsersuutit tamarmik maleruagassanik, malittarisassanik killiliinissamullu tunngavissanik qaffasissunik, nunani arlalinni nunanillu tamalaani oqalliffinni atorneqartunik atuinissamik tunngaveqarput.

Aammattaaq misissueqqaarnerit ujarlernerillu isumannaatsumik avatangiisinillu mingutsitsinngitsumik ingerlanneqartarnissaat qulakkeerniarlugu, sumiiffinni sulinissamut maleruagassat ataatsimoortut immikkut ittut ineriartortinneqarsimapput. Ilitsersuutit (guidelines) tamarmik Aatsitassarsiornermut Oqartussaasut nittartagaanni (www.govmin.gl) nassaarineqarsinnaapput.

Apeqqu 2:

Aatsitassat qaqutigoortut, uran ilanngullugu, avatangiisinut, aalisarnermut piniarnermut uumasuuteqarnermut nunalerinerit minnerunngitsumillu inuit peqqissusaannut ajortumik sunniuteqannginnissaat qulakkeerniarlugu naalackersuisut, immikkut ittumik pilersaaruteqarpat?

Apeqqutip peqqissutsimut tunngasortaanut akissuteqarnissamut isumassarsiorfissanik Peqqissutsimut Naalackersuisoqarfimmut piniartoqarpoq.

Akissut:

Apeqqu 1-imut akissut takuuk.

Ingerlatseqatigiiffiup ilaatigut ingerlatseqatigiiffik nunameersunik qaqutigoortunik uraninik akulinnik piiaanissamut akuersissummik tunineqarsinnaanersooq pillugu

Naalakkersuisut isumminnginnerini, ingerlatseqatigiiffik ASN-imut nalunaarusiortussaavoq. Ingerlatseqatigiiffiup oqartussaasut naammagisimaagaannik aatsitassarsiornerup avatangiisit, isumannaallisaaneq peqqissuserlu eqqarsaatigalugit isumannaatsumik ingerlanneqarsinnaasoq uppersarsarsinnaasussaavaa, aatsaallu tamatuma kingorna aatsitassarsiorfimmik pilersitsisoqarnissaa Naalakkersuisunit akuerineqarsinnaavoq. Avatangiisinut pinngortitamullu sunniutaanerluttussat annertuallaassasut, aammalu suliaq aalisarnermut, piniarnermut nunalerinermulluunniit illersorneqarsinnaanngitsunik kinguneqartussaasoq ASN-imi takutinneqarpat, Kuannersuarni aatsitassarsiorfimmik pilersitsinissamut ingerlatsinissamullu akuersissummik tunniussisoqarsinnaanngitsaq Naalakkersuisut aalajangiiffigisinnaalissavaat.

Naalakkersuisut 2015-imi ukiakkut ataatsimiinnermi innuttaasunik illersuinissaq eqqarsaatigalugu Naalakkersuisut qinngornerit ulorianartut qinngornernullu illersuinissaq pillugu inatsisissatut siunnersuut saqqummiuppaat. Inatsimmi innuttaasut qinngornernut ulorianartunut illersorneqarnissaat pingaarnertut siunertarineqarpoq. Tassalu inatsit ataatsimut isigalugu innuttaasut tamarmik qinngornernit ulorianartunit sunnerneqarsinnaanerat eqqarsaatigalugu qinngornernut ulorianartunut illersuinissaq maleruagassiuunneqarpoq. Qinngornernut ulorianartunut illersuinermi suliffeqarfiit tamatigut qinngornernut ulorianartunut inatsimmi maleruagassat malittartussaavaat. Tassalu Aatsitassarsiornermut Inatsit malillugu akuersissutini piumasaqaatinik aalajangersaanermi minnerpaamik qinngornernut ulorianartunut inatsimmi qinngornernut ulorianartunut qinngornernullu illersuinermut piumasaqaatit malinneqartussaapput. Aatsitassarsiornermut inatsit malillugu akuersissutini taakkunani piumasaqaatit, qinngornernut ulorianartunut inatsimmi piumasaqaatinit sakkortunerusut aalajangersarneqarsinnaapput. Ataatsimut isigalugu Aatsitassarsiornermut inatsit malillugu akuersissutit, kiisalu qinngornernut ulorianartunut inatsimmi innuttaasunut nalinginnaasunut illersuinissamut piumasaqaatit innuttaasut avatangiisillu tamarmik pitsaasumik peqqissaartumillu illersorneqarnissaannut tunngavilliisut, Naalakkersuisut isumaqarput.

Apeqqu 3:

Pinngortitap avatangiisillu mingutsinneqannginnissaat qulakkeerniarlugu piumasaqaatinut killissarititanut nalilersuutit suut atorneqassappat?

Apeqqutip peqqissutsimut tunngasortaanut akissuteqarnissamut isumassarsiorfissanik Peqqissutsimut Naalakkersuisoqarfimmut piniartoqarpoq.

Akissut:

ASN-imut nassuiaat aatsitassarsiornermi pineqartumi alapernaarsuinerup qanoq ingerlanneqarnissaanut nassuiaatinik imaqassaaq. Oqartussaasut killissarititaasunik uuttisarneranni pingaartumik aatsitassarsiornermi ataasiakkaani pissutsit marluk apeqqutaatinneqartarput. Siullermi alapernaarsuinissaq ASN-imi qanoq allaaserineqarsimanersoq, aammalu akuutissat il.il. suut misissorneqartassanersut apeqqutaavoq. Aappaani qinngornernut ulorianartunut qinngornernullu ulorianartunut illersuinissamut inatsit naapertorlugu akunut killissarititaasut uuttisarnerillu qanoq aalajangersarneqarsimanersut apeqqutaavoq.

Aatsitassarsiornermi ASN-imut nassuiaasiortarnermut ilitsersuutit naapertorlugit saffiugassanut arlalinnut kiisalu akuutissanut mingutsitsisunut killissarititaasut aalajangersarneqarsimapput. Killissarititaasut taakku tamatigut Kalaallit Nunaanni aatsitassarsiornermi tamani malinneqartussaapput. Aatsitassarsiorfinni ataasiakkaani akuutissat aalajangersimasut, pinngortitaq peqqutaalluni qaffasissumik annertussuseqarpata, taakku kisimik atuutsitsivigineqanngillat. Sumiiffimmi pinngortitaq peqqutaalluni akuutissanit ataaseq amerlanerusulluunniit qaffasissut paasineqarpata, sumiiffimmi akuutissaq/akutissat pinngortitameersut aallaavigalugit aatsitassarsiornermi killissarititaa aalajangersarneqassapput.

Apeqquut 4:

Aatsitassarsiornermiit eqqakkanut nunatsinni tatsinik atuisoqannginnissaanik uran pillugu immikkut ilisimasallit inassuteqaataanut Naalakkersuisut qanoq isumaqarpata?

Akissut:

Aatsitassarsiornermi eqqakkanik tatsinut eqqaanissaq ASN-imi allaaserineqartussaavoq. Eqqaanissaq illersorneqarsinnaanersoq ASN tunngavigalugu oqartussaasut naliliissapput. Oqartussaasut pisussaapput, taamatut naliliiniarnermini avatangiisinut sullissiviit ilisimatusarnermik suliaqartut attuumassuteqanngitsullu atussallugit, taannalu Aatsitassarsiornermut Inatsimmi § 3 a, imm. 4-mi allassimavoq.

Aatsitassarsiorfinnik matusinerit avatangiisinut peqqissutsimullu isumannaatsumik ingerlanneqartarnissaat, taamaalillunilu najukkami avatangiisit mingutsinneqannginnissaat tamanut piumasaqaataavoq. Aatsitassarsiornermut atatillugu tatsinut eqqakkanik eqqaanissaq akuerineqassappat, taakku siunissamut ungasissumut avatangiisinut ajoquseeqataannginnissaat uppernarsarluarneqarsimasussaavoq. Aatsitassarsiorfiusinnaasumik matusinissamut pilersaarutit, aatsitassarsiorfimmik matusinnaanerup aallartinneqannginnerani Aatsitassarsiornermut Oqartussaasunit akuerineqarsimasussaapput.

Apeqquut 5:

Qanoq ilillugu Naalakkersuisut qulakkeersinnaavat, aatsitassarsiornermut atatillugu nunatta avataaniit aningaasaliiniartut pinerluuteqarsimanermit attuumassuteqannginnissaat?

Suliassaqarfik taanna Aatsitassarsiornermut Pisortaqarfiup isumagisassaraa, taamaattumillu apeqquummut akissuteqaat tamarmi tassanngaanniit suliarineqarpoq.

Akissut:

Ujarlernerit atuinerillu, Kalaallit Nunaanni aatsitassarsioqatigiiffinit, toqqaannartumik toqqaannangitsumilluunniit nunani allani nalunaarsorneqarsimasunit ingerlanneqartut, Kalaallit Nunaanni inatsisit sukkuilluunniit atuuttut naapertorlugit ingerlanneqassapput.

Kalaallit Oqartussaasut, aatsitassarsionernut pineqartunut naalackersuinikkut akisussaasuusut, suliat Kalaallit Nunaanni inatsisit aamma nunani tamalaani isumaqatigiissutit ingerlanneqarnissaannut akisussaasuupput.

Nunani allani ingerlatseqatigiiffiit, Kalaallit Nunaanni ujarlernissamut atuinissamullu aningaasaliisut amerlanertigut nunani allani aningaasanik niueruteqarfinni nalunaarsorsimasarput, tusindinik arlalinnik aktiatigut piginnittoqarsinnaallutik. Nunani allani aktianik piginnittut akornanni pinerluttoqarpat, imaluunniit pinerluttunik attaveqartoqarpat, pinerluttoqarneranik pasitsaassisoqarsimappat, nunami pineqartumi oqartussaasut paasiniaanissaq immaqalu eqqartuussisulersuussinissaq akisussaaffigissavaat.

Kiisalu § 37 naapertorlugu apeqquteqaat 2016-019, pineqartumut tassunga attuumassuteqartoq innersuussutigineqarsinnaavoq.

Inussiarnersumik inuulluaqqusillunga


Mala Høy Kúko



Inatsisartuni ilaasortaq
Anton Frederiksen
Partii Naleraq

**Aatsitassanik ujarlernermet uranimullu atatillugu avatangiisinik illersuinissaq
pilugu § 37 96-i naapertorlugu apeqquteqaammut akissut**

Asasara Anton Frederiksen

Aatsitassanik ujarlernermet uranimullu atatillugu avatangiisinik illersuinissaq pillugu apeqquteqaatinnut qujanarujussuaq. Ajoraluartumik piffissaliussa qeqqorsinnaanngilara, suleqataasunit attuumassuteqartunit immersorneqarnissara utaqqigakku.

Kingusinnerpaamik 26. april 2016-imi apeqquteqaatinnut akissutikka ilinnut nassiutissavakka.

Inussiarnersumik inuulluaqqusillunga

Mala Høy Kúko

18. april 2016

Akt. Nr. 2518288

Postbox 1614

3900 Nuuk

Tlf. (+299) 34 50 00

E-mail: paian@nanoq.gl

www.naalakkersuisut.gl